

Yisuf

Me mo bim n'ídekireh ba búteekinkinan
misaalhu údiigeeno m'aretuhne Yisuf, Yisuf
úbáku Yankuba. Nunom, gurethinem Rasel.

Iyoo, Yankuba, bááhu Yisuf ajahjah
indikaam inak. Uliiho, gurethinem Liya.
Inini Liya adimbayadimbaya dáde.
Udikaamo unakinno, gurethinem Rasel.
Úmár ñódiigeen ñonak bareŋ gayikne, Yisuf
ingi Bensamin. Kanda banay guŋano
konakinno Díino adoohom.

Yankuba apokunpokun indikaamankánam,
kanda Rasel ganinkne a hafithinem. Faka,
Yankuba, apokunpokun jarakánam nip,
kanda jarku Rasel gafanumne n'apokun
m'anretuhne Yisuf ingi Bensamin.

Afúrumi na, Yisuf, bayiki díinenŋ

butinken ingi anakan, báábám anaham
gusol gújooni gagat. Fo índoonenenkinem
anfégemne n'akaana gusolo gújoonino
gúmár, immeren nip anuyeenin mara
andómadoma. Anyikyik kenkaare a nintiku
ni bááhánin acaabenne Yisuf.

Ayik jaket, Yisuf akihiya. Bakengi, adék
atifur índoonemen ñankihinem ayéjeenin,
«Me ii, ikihiyakihiya n'innayoonun jafac.
Kanda f'ennayoonunne búneebinku
banéebino, búneebinkum ahar awonnoora
ki íneebinkinan awonn akool bunaam.
Bankooli búneebinkum, íneebinkinan
andiigirina f'ammapun réengo. Nim
gikihiyane.»

Bamiñilay, Yisuf afak akihiya k'adék
atifur índoonemen ingi báábám ayéjeenin,

«Me ii, ikihiyakihiya n'ífeg bísibaŋo ingi
júuno ingi hahúur haala ingi úngonduk.
Hámárán nip andiigirinadiigirina a binaam.
Nim gikihiyane.» F'ayennehinne hómár,
báábám Yankuba añuumul ayéjem, «Fi,
karo na úsiibásiib búyej mara ayikhineh
bísiba bi me ingi nunkon ingi
índoonenenken haalaŋo injoyahánemiŋ a
binankan!» Índoonemeŋ mees añuumul a
gubaarhu ñankiho ñámár.

Bamiñilay hotir, índoonemeŋ haalaŋo
andék bikooñhu saahaŋaŋo ingi
fajaameneŋo. Andék anŋantin. Kanda Yisuf
dékiŋeŋ, a dígo ganoone. Bayiki ásibaŋ,
báábám ayéjem, «Kokálint índoonenenken
k'úfegireeniŋ n'ankanne bim k'uŋooliner
k'úduk úteekinem.» Balóbi nim, Yisuf adék.

Angu, índoonemen, banɗandenti Yisuf n'adékirehne anlób anyéjay, «Ningen ban! Ummu ñankiho umononi n'adékireh deh. Inini, gapútári, imbujomon inworomon a koloŋo inon n'ayimne, ki gímputon a dígo ínyejon bááhintor, karo abón asanari abujemne. Nim ungu ñankihinem danafaham.» Nim índonkayo anjamfahemne. Kanda údonkánin ulaamero, m'aretuhne Ruben, úmár lókiiren a gúlobo gúmár. Ayéjeeni, «Dahu úduk ubujomon. Aji úsiibahan, uworomon a koloŋo n'ayimne, kanda dahu ubujomon!» Úpájuli údoonom ulaamero, n'asíibaherne ki nim ungu apiren anfúnnurom k'apahánam k'adékirem imbi báábám.

Angu, Yisuf apútor. Ruben ulaamero m'ayéjne biki ambujom adék bikooño.

Badoonay mees índoonemen anlah Yisuf a gusolo gu báábám anéeremne anfúnn. Banfúnni gusolhunom mees ankir anworom a koloŋo n'ayimne k'annooh na k'anyaahála. F'anŋane guyaahálaŋo anfég ñonkomoŋo ingi jamaŋo ingi bayaaho jup n'andékirehne. Immeren, ba Esipt gandékehne gujuliyaŋo. Banfégeeniŋ, Juda ayéj índoonenenkinem, «Inini, aji imbujon Yisuf, horaŋ ganafahánehne? Danafa mintor honj! Inini injuliyahomon imbi m'andékirehne k'andékirem ki mintor inyikumon na bakodiŋo.» Índoonemen anlóki k'anfúnnor Yisuf a koloŋo anjuliar ñanjuliyaŋo m'anŋane hadéko ba Esipt. K'angu, andoohom k'andékirem ba bim.

Ruben, údonkánin ulaamero, baŋoolinti amiiheeniŋ ayéj, «Yisuf umoraŋ?»

Índoonemen anyéjem, «Yisuf
ajuliyahaajuliya.» Banlóbi nim Ruben
ajuhula dáde k'ayéj, «Inini, neeraŋ
ginkankunoonuŋne?» Angu índoonemen
andék anlah fajaamen ambuj. Bambuji
andooh gusolhu Yisuf annum a muheeno
k'amparparin k'andooh gusolo anŋúnjur.

Bampúti a dígo, anyéj bááhánin, «Inga,
karo gusolhu Yisuf? A binaalo
gitotuntuminne. Karo man gúmár o?»
Bááhánin, bafégi gusolo ayit. Awuuga ayéj,
«Oo, man gusolhu úbákum. Aguyhune
abón asaŋari abujemne. Úbákum
aniironiirro!» K'akomb jihoonjo. Angu
índoonemen anŋay bumaanenkinem kanda
pirendom. Bááho ayéj, «Meme ihonkáneh
úbákum fo baman d'inirohunehe.»

Angu, ñanjuliyango, bampúti Esipt,
andékur Yisuf ba a marsehu ñansóogo.
Bampút anjuliya Yisuf. Údiigeeno m'agilane
Yisuf, gurethinem Potifa. Úmár ingine
ulaameku ñammarahu umaasango. Potifa
angan Yisuf a díkinem ki k'aguy na
úsokánom. Hómár aléerum Yisuf dáde,
kanda haman nim afiyum Díino Amunduko.
Alah Díino apirenne amaraham haman
ineen bukukunom anantinne. Angu Díino
anah Yisuf k'ahat doho nohon nohon.
Hogurumaaren ho Potifa atéekinne Yisuf
k'akaan, adék akaan hóbun. N'ahatne
dohongo dáde, ayéjem amara díkinem nip
ingi kuyikhinem nip. Angu Díino akimbul
harjeno a díku Potifa a gubaarhu Yisuf.

Agida Yisuf Údiigeen m'ajoon dáde.
Adékiidek udikanku Potifa adék apokunom

fo baman asíiba k'anwaanay, kanda Yisuf afoyom k'ayéj, « Me dipiren k'ikaan hójondoŋo n'úyejne a sígihu Díino.»

Iyoo. Afúrumi na ni Yisuf afoyemne, anuyom dáde k'adék akalamam imbi údiigenkinem. Ajodamam ayéj údiigenkinem, «Usókintor Yisuf apokunpokun me deh! Inga gub ahubemhub pur k'awaaninem kanda me ifoyfoy.» Bayennehini hómár, Potifa, jifahánam anuy dáde k'adék alah Yisuf adékirem a kasoŋo akimbenem na.

Afúrumi na haani a kasoŋo, Díino fiirandaŋ Yisuf. Akááñinemkáánin dáde. Ulaameku kasoŋo afég mara Yisuf wúur újooni. Adoohom akaanam k'amara m'angune na a kasoŋo nip.

Agida a kasonjo ámár, ayikyik mees
údiigeen m'úpájul m'aguyer fam uminister
k'adóolo a gúbidhu umaasajo. Ayiki bísiba,
akihiya. Gucunkunom, adék atéekin Yisuf
h'akihiyane. Ayéjem, «Me ikihiyakihiya
n'ífeg sinohu resejo s'ayik hakaan halall.
Hakaano hámár adímdim resejo jup. Ilah
kupo k'ipusin na bídimerenku resejo k'ídek
íneer umaasajo gulandáro k'aruuh. Nim
gikihiyane.»

Angu Díino akankaan ki Yisuf apiren
akeekul ñankihinem. Ayéjem, «Inini,
hakaano halallo h'úfegne, hámár agune
iniman ásibaŋ alallaŋ. Nanka ba ásibaŋ
alallaŋ, umaasajo adékikineh afúnno nanka
k'aŋoyino ba a dohohon n'udohoherne fam.
Nim gakankunehne. Kanda, bonkerer
uŋoolindir a dohohon, úlob ingi umaasajo a

gubaarhu me ki k'afúnn me mees a kasonjo.»

Afúrumi na, man ni Yisuf ayéjne, man nim gayikne. Umaasajo afúnnáfunn uministeero a kasonjo k'anjoyinem a dohojo n'adólohne fam. Kanda uministeero bafúnnaa a kasonjo, afiiram Yisuf. Kiinaaraŋ umaasajo pur ki úmár mees afúnnaa.

Díineŋ anakaŋ awusuna, Yisuf man na a kasonjo. Ayik jaket, umaasajo faŋo akihiya. Akihiyakihiya n'afég ahayaŋ amákilaŋ ingi anakaŋ n'anfúror a jakaamo. Anŋay gufoolaŋo. Ámárán andiyadiya dáde. Kanda ahayaŋ amákilaŋ ingi anakaŋ antifilinne ahayaŋo n'anyikne arino. Ámárán tu añehñeh dáde. Adékiidek amákilaŋo ingi

anakaŋo n'anñehne, andak ankáb
adénneŋo n'andiyane. Nim umaasaŋo
akihiyane.

Umaasaŋo, bakengi ahuy ñanlónDAHINNO
m'angune na nip. Ajóguneeniŋ kantíg
ínkánduk k'atéekineeniŋ ñankihinem ki
gúduko ampiren ankeekul. Kanda
pirendenŋ k'ankeekul! Yikireŋ m'ahat a
binanin! Agida dam uministeero
m'aguyerne fam a kasoŋo ingi Yisuf, úmár
mees asosor. Bayennehini ñankihu
umaasaŋo alentála Yisuf ingi n'ahatne
bukeekihu ñankiho. Adék atéekin umaasaŋo
ki úmár ayéj, «Inini, huyulom!»

Angu andék anfúnnor Yisuf a kasoŋo.
Ayéj adék ayica k'annéerem bayaah bajóoni
k'akaana k'ankir andékirem imbi umaasaŋo.

Bapúti umaasaŋo ayéjem, «Me ayikyik ñankih ñ'ekihya. Anyéjyej mara fi upirenkinene ukeekirem ñankiho ñámár.»
Yisuf ayéjem, «Me morahum, dipiren k'ikeekul. Kanda Díino Amunduko apiren ajellihinem n'iñantane ípájul k'ikeekul.
Angu, umaasaŋo atifirem ñankihinem.

Umaasaŋo batifur Yisuf ñankiho, Yisuf akeekirem ayéjem, «Ahayaŋo amákilaŋo ingi anakaŋo n'andiyane, nómaránj ingine díinenj amákilaŋ ingi anakaŋ no jafoolaŋo ajónkánehne dáde imbi Esipt. Kanda ahayaŋo amákilaŋo ingi anakaŋo n'anñehne, nómaránj ingine díinenj amákilaŋ ingi anakaŋ no gufoolaŋo dayik. Jafoolaŋo amankihine dáde. Inini, díinenj amákilaŋo ingi anakaŋo aliiheŋo, ámaránj gufoolaŋo afukáneh Esipt, kanda díinenj amákilaŋo

ingi anakaŋo n'antifiremne, ámárán
jafoolaŋo dayik. Díino akankáneh ki gufoola
dayik.»

Angu umaasaŋo amiih Yisuf ayéjem,
«K'inkaanoonuj inini neeraŋ?» Yisuf
ayéjem, «Inini, fi umaasaŋo uñantay
ucaaben wúur m'apirenkineh afankanta
jafoolahu didiirahu Esipt. Añantay
afankanta buruhu díineŋ amákilaŋ ingi
anakaŋ. Caabent údiigeen m'akuna,
m'ayehun k'afankanta jafoolaŋo ki díineŋo
no kúugo apútokunehne, agida n'afankanta
jafoolaŋo jup ki nim kúugo dabuj jamaŋo.»
Umaasaŋo alóki gúloku Yisuf k'ayéj, «Hoge
ayikyik m'afankáne Yisuf buhathu dohoŋo
ámár?» Ayéj Yisuf, «Díino ajellihinenjellihin
h'adékehne bukaano. Nanka Esipt, yikireŋ
údiigeen m'akuna, m'ayehun iniman fi fi

Yisuf. Íbendiren didiiraŋo nip k'umara.
Afúrumi me nanka Esipt, fi fi utifemne.
Inini fi ingine kumandaŋo no Esipt nip.»

Nim gakaanorumne ki Yisuf aguy
umarahu Esipt nip. Adohodoho dáde.
Jandiŋ díineŋo amákilaŋo ingi anakaŋo
badétumne no gufoolaŋo ayikne,
yohálahadaŋ. Alód ígur íde k'ancúufen bim
jafoolaŋo ki nim angu waathu kúugo
gapútári, agida n'anfankanta guyaahála
gúde ba a waato nómár. Buruhu díineŋ
amákilaŋ ingi anakaŋ jamanku Esipt anfac
jafoolaŋo jup. Andooh hotir ba
guyaahálaŋo k'annink jup a íguro man ni
Yisuf atéekineeniŋne.

Díino amákilaŋo ingi anakaŋo bapúturi,
díino luburoŋ. Jamanku Esipt ingi jamanku

bakooro báduko facáranan honj. Kanda agida n'ayik jafoolaño jup a íguro mi Yisuf alódne Esipt. Fo kúugo apúturne, Yisuf akimbul íguro ímár ki jamaño andékireh angila na guyaahálanjo. Jamaño anramunramun Yisuf dáde.

Angu kúugo alibila bejen bejen baman a didiirahu Keenan ka bádinku Yisuf angune. Immeren mees, jafoolahánin adédet. Angu bááhu Yisuf ayéj imberenkinem, «Iyennennehin n'anyéj mara Esipt ayikyik bim gufoolaño dáde. Inini dékeren ugilatam bim k'inyaahálahoonun ki nim kúugo dabuj mintor.» Angu índoonenenku Yisuf andéker ba Esipt ba gugila gufoolaño. Fo Bensamin, úmár afallarne bim ingi báábám.

Bampútri, antéekineeniṅ mara aññantay andék imbi kumandaṅo ki úmár anéereeniṅ jafoolaṅo, k'andék. Bampúti imbi kumandaṅo anṅoya a jannokunom. Yisuf ayit índoonemenṅ kanda immerenṅ yitárom. Neeraṅ gampirenkinehne ampájul mara kumandanku Esipt nip ingine údonkánin mu immerenṅ anjuliyaṅe ankaanam úsoog!

Yisuf lahádeenṅ honj a hafithinem, fo básuum bareṅ. Kanda asíiba k'apájul karo índoonemenṅ antiftif mahar a gubaarhu h'ankaanemne fam. Angu akomb balóbo aléer ingi immerenṅ. Ayéjeeniṅ, «Ninkinan ñandín beeranṅ? Beeranṅ gúfurunteṅne?» Anyéjem, «Mint índonkay haala. A didiirahu Keenan gífuruntuminne.» Kanda Yisuf akaan iniman dómaronṅ ho immerenṅ

anlóbne. Ayéjeeniŋ, «Ninkinan jamaŋ m'ansinar. Guyroŋ jamaŋ m'anwúuh. Hoge imberenku bááhánan n'ampútne haala, ninkinan nip ulitinayenlitinay?» Anyéjem, «Woo, kódonkint k'afanumne n'atiir, úmár angune bim a dígo ingi bááhint. Kanda údonkint úduko, úmár aniironiiro.» (Ikaanumi, Yisuf awosen ayéjoora, «Me niirori de!»). Kanda Yisuf akaan iniman dómároŋ h'anlóbohne k'alaheeniŋ afant aninkeeniŋ a kasoŋo buruhu ásiibaŋ alallaŋ.

Bísibaŋo bilallinno bapúturi, Yisuf afúnneeniŋ a kasoŋo k'ayéjeeniŋ, «Me giri ídekeh ba bubujhánan, kanda ísiibásiib k'ípájul karo ninkinan gúlobohoŋlob marigeno. Úmánduk bareŋ aŋoolinkineh a kasoŋo ki índukoŋo aŋjúñ k'andékurer kódonkánan m'afallarne bim.» Angu

annéebin údonkayhinin m'aretuhne Simiyon anworom a kasonjo. Ayéj índukonjo, «Inini, upirenenj únjuñoj ba a díkinan.»

Afúnneeninj a gufaco. Banfúri mees, ayéj ñandóolhánom, «Runtenj jafoolanjo a boorejenkinin. Faka unjoyindeeninj bakodiño b'andoorne ukaananj a boorejeno.» Ñandóolo ankaan ni Yisuf ayéjne. Annéer índoonemenj k'anjúñ.

F'anjanane gújuño, anfég bakodiño a boorejeno. Hómár alaaleeninj dáde, ambenuh. Bampúti a dígo, antéekin bááhánin h'awusunane Esipt.

Antéekinemteekin ho kumandanjo alóbne nip. Yankuba ajuhula ayéjeeninj, «Horanj akanne úteekinenj kumandanjo mara uyikenjyik údonkay úduk nanka? Bensamin dadék Esipt. Údoonom aniironiirro, inko

bareŋ afallahemne mi Rasel abosáremne.
Dapiren k'adék ingi ninkinan.»

Afúrumi na kúugo afaŋunum n'afuuh.
Gufoolaŋo afak adét ki Yankuba ayéj
jara kánam, «Inini, ŋoolinten ba Esipt
k'utibilahaŋ bim jafoolaŋo.» Índonkayo
anyéj, «Mint, dibollenmiŋ inŋoolinmiŋ Esipt
ni Bensamin dékireŋ.» Angu údonkay
m'aretuhne Juda ajíkirind báábám ayéjem,
«Me imaraháne kódonkum. Isíibásiib
k'ufiyumem k'úneerem Bensamin.
Ikankáneh feerhum tu k'aŋooliner. Kanda
iñantamiŋ ídekmiŋ, mint índonkayo nip. Aji
dékirimiŋ, kúugo abujhuneŋ mintor.» Angu
bááho abéneeniŋ k'andék.

Bampúti Esipt, anpak andék imbi
kumandaŋo. Fo Yisuf afégne Bensamin

afúror ahoon a gubaarhu básunku búfeku kódoonom. Kanda afant atúy bujellihinkinin úmár ingine hantaŋ. Ayéj índoonemen andék a díkinem. Bampúti anyaahála. Anéereeniŋ aharo, kanda anéer Bensamin aharo afaŋund índoonenenkinem dáde, kanda haman nim índoonemen lahudom jifa.

Jaketo ámár Yisuf ayéj údoolhánom adooh booreŋenku índoonemen k'arun na jafoolaŋo a boore noŋon noŋon, aŋoyin anink na bakodiŋo bannéeremne. Kanda a boorehu Bensamin ayéj anink na gulandákánam gújoonino g'afaŋumne n'aser.

Angu gucunkunom tápáro, índoonemen anguy a binaalo gúŋuño. Yisuf ahuy

údoolhánom ayéjem, «Gít! Gulahuni
índiigeeno menen úyejeeniŋ - horaŋ akanne
údugiyeŋ gulandáku kumandaŋo?» Angu
údoolo adék alahuneeniŋ a binaalo.
Amiiheeniŋ ayéjeeniŋ, «Horaŋ akanne
údugiyeŋ gulandáku Kumandaŋo?»
Índonkayo anwaalaram k'anyéj,
«Bollendimiŋ ingi Díino k'ikaanmiŋ hómár.
Yeerar a booreŋenkint. A boore noŋon
noŋon gúfekinehne gulandáro, m'amune
booreŋo ámár aniirohuneh.» Angu údoolo
ayeera. Afég gulandáro a boorehu
Bensamin. Índonkayo anjuhula dáde.
Údoolo asíiba k'anŋoolin úmár bareŋ ingi
Bensamin kanda índoonemeŋ nip anŋoolin
ba imbi Yisuf.

Bampútri a díku Yisuf anŋoya baman a
réeŋo a binanam. Yisuf alentalenta ñankiho

ñankihaherne fam. Ayéjeeniŋ, «Horaŋ gukaaneŋne? Údiigeeno mu gulandákum afúnnuntaane a boorehinem, úmár aguyhuneŋ úsokum. Kanda ninkinan m'ufallaheneŋne, dékereŋ ingi básunkánan.»

Angu Juda abááhála ayéjem, «Iyikyik gúlob g'ídekeh ba balób. Dahu úhoojaram, me úsokon. Mint ii iyikminyik bááh m'alaamer dáde, kanda kódonkum, bááhum apokunempokun dáde. Údoonom m'ambabne nunk aniironiio.» Angu Juda akomb butifhu h'awusunane ingi ni báábám apokunne Bensamin. Ayéjem, «Aji Bensamin ŋoolindeŋ imbi báábám, bááhint aniirohuneŋ! Me dipiren k'ĩŋoolin ni Bensamin ŋúnjoŋ. Inini bénem ki me iguy úsokon buruhu kódonkum inko ki úmár aŋúñ.»

A halóbo hámár Yisuf pirenden
k'añooba. Afég ni índoonemen mídenen
ingi fam. Ankúbulakubula. Angu afúnn
ñandóolhánom a bílido. Banfúri, Yisuf
akomb jihoonjo. Ayéj índoonemen, «Me
ingine Yisuf, údonkánan! Hoge bááhum
ummo bim básuumo?» Kanda índoonemen
ambenuh dáde. Údiigeeno úmár, neerañ
gapirenkinene aguy kohambaaniño
k'ajuliyahaane Esipt? Karo Yisuf
awaañaháneh? Angu Yisuf
asúumsuumineeniñ ayéjeeniñ,
«Téejaaramuñ.» Bantéejahem ayéj, «Dahu
ubenihen a gubaarhu n'ujuliyahemuñe.
Díino akanne ki me ídeker nanka k'ipahun
jamaño jup. Inini, majaaren. Ñúncen k'úduk
úfegiren bááhum. Yéjeremen me momiye
imbi. Niirori! Ihaamihaami búfekinem.

Inini, afallay faka dííneŋ amákilaŋ no wúur dafac jafoola. Bááhum anñantay andéker imbi ingi ninkinan ingi jarakánan. Imbi ayikhineh gufoolaŋo ba ninkinan nip.» Angu Yisuf agoob índoonemeŋ. Afaŋum n'agoob kódoonom kotiirinno.

Yisuf abúuñur báábám búuña adé. Ñofaliŋ buruhur ingi jafoolaŋo ingi bayaku Esipt jup. Afúrumi na, índoonemeŋ anŋúñ. Bampúti imbi báábám, úmár bafégi bayaaho ayéj, «Horaŋ?» Anyéjem, «Yisuf niiroroŋ! Ummo bim Esipt. Úmár ingine kumandanku Esipt nip.» Guliiho bááhánin dómároŋ, kanda bafégi ñofaliŋo n'ayifirne búuñahánam jup akir apájul mara gúlobo ungu gúsuumiinno marigen. Asúumom dáde buyennehino mara Yisuf niiroroŋ. Ayéjeeniŋ, «Isíibásiib búfekinem.»

Angu Yankuba ingi bádinkinem nip andéker ba Esipt. F'anṅayrne hadéko, Yisuf adooh jíbooñhunom k'adék ba burahálinkinin. Banrahi, akuc agoob báábám. Immerenṅ inako, moṅon moṅon akul munkulhu básuum, mu jhonku básuum. Angu Yisuf anṅáábiner báábám ba imbi umaasaṅo. Bampútri, bááho aramun umaasaṅo k'aduwaram. Umaasaṅo asúuma ingi bááhu Yisuf dáde.

Yankuba ingi dimbayankánam nip anguy Esipt a resiyonku Gosen. Na gangune ingi abónonkánin nip. Jamanku Esipt ganhuyohuy immerenṅ, Jamanku Israyel mara Yankuba, gureto gúduko gu Díino anéeremne ingine Israyel.

Angu a didiirahu Esipt, Jamanku Israyel

andék anrumun ambár siy adé. Kanda Yankuba, bala baniromne ayéj Yisuf, «Me haani inihiro, dahu úwubomuŋ imbi Esipt. Úŋunjuromuŋ ba a didiirahum d'ayéjuhne Keenan, didiiraŋo di Díino anéeremne. Iyoo, na misaalhu Yisuf amukne. Kanda impirenoŋ ínfegumuŋ na mara Díino bayunahadaŋ bikooñhu jamankánam. H'ajíkirindne Ibrahiima fam a nintiku maŋ n'ambosayhinehne anrumunkuneh dáde maŋ hómár ayikne. Díino afak akooñ Yisuf a didiirahu Esipt. Fo índoonenenkinem ampútne bim, immeren mees Díino akooñeeniŋkooñ f'andék anguy siy adé, maŋ ni Díino ajíkirinderne bááhánin Ibrahiima.

Kanda inini bádinku Yankuba imme bim Esipt. Inini, hóge immeren andék

ammuyhunek didiirahu Keenan, didiirango di Umuyhintor ajíkirindeeniŋne? Agi inliirehoŋ Gúloku Díino índek ínfekunoŋ.

Iyoo, inini mintor, Díino afak ajíkirind mintor tu mara ayikhineh m'apahunkunehne jamaŋo, te úmár afúrumokuneh a siyo ámár, no Ibrahiima agune bááho. Nim Díino ayéjne, kanda hóge hómár adék ayikhineh maŋ ni ajíkirindne mintor? Iyoo hómár tu uyennehinkineŋ a Líbárho Gúloku Díino. Díino gakaanakaan abena h'ayéjne.

(Agi úsiibay k'uliire misaalhu Yisuf a Líbárho Gúloku Díino, k'uku uliire líbáro n'aretuhne Jenes, sapitáro 37-50).

Na gúlokum amukne.